

BATAKURU PUULUSA ARANURU

HAA E 'BE KORENTI 'BEN

1 ¹ Immorde e an min Puulusa, mo Alla noddiri kodduruyee mun on fii wonugol *sahaabaajo Iisaa Almasiihu on, e oo musid'fo wi'eteedo Sosteene, ² haa e ngal *moftal Alla wongal Korenti, subiraabe humondiral e Iisaa Almasiihu on, noddaabe wonugol yimbe Alla, wondude e kala jantotoobe innde Iisaa Almasiihu Joomi men on nokku kala ka be woniri, dun ko on Joomi mabbe e Joomi men.

³ Yo moy'ere e buttu wonan on, immorde e Alla Baaba men, e Iisaa Almasiihu Joomi on.

Fii no Puulusa Jarniri Alla fii be Korenti ben

⁴ Mid'o duumii e jarnugol Alla fii mon, fii moy'ere nde Alla yedi on nden sabu Iisaa Almasiihu on, ⁵ dun ko e nder humondiral e makko aldirfon kala huunde e kala kongol e kala gandal. ⁶ Ko fii seeditoore *Almasiihu on tabintinaama few e mon. ⁷ Ko dun wadi jooni, dokkal woo qakkanaa on e nder ndee habbannde nde wondon e mun fii feejoygol Iisaa Almasiihu Joomi men on. ⁸ O tiidinay on kadi haa ka rawnoode, fii wota on laatoyo felniibe jande ardu Iisaa Almasiihu Joomi men on. ⁹ Alla ko Sella-Findeejo, dun ko on Noddudo on fii yubbondirgol e Bid'fo makko on, Iisaa Almasiihu Joomi men on.

Fii Sendondiral Mofte Korenti den

¹⁰ Mi wakkilinii on, yo musibbe, e innde Iisaa Almasiihu Joomi men on, on fow jogee kongol gootol fii wota sendondiral wonu hakkunde mon, e maanaa fedde-fedde, kono wonee e nder nanondiral tiidungal e nder miijo woto e hakkille goote. ¹¹ Ko fii, yo musibbe an, bee yimbe oo debbo wi'eteedo Kuluyee humpitii lan fii mon wonde, yeddondire no hakkunde mon. ¹² Mi nanii wonde mo

kala e mon no wi'a «min, ko mo mi Puulusa», oya kadi wi'a «ko mo mi Apoloosi», goddo on kadi wi'a «ko mo mi Petruusu», oya on wi'a «ko mo mi Almasiihu on!»

¹³ E hara Almasiihu on senditino? Kaa Puulusa fempano fii mon? Kaa ko e innde Puulusa *lootiradon maande kisiyee? ¹⁴ Awa mi weltanike Alla ko tawi kon mi lootaali hay gooto e mon maande kisiyee, si hinaa Kirispuusa e Gayuusi. ¹⁵ Ko dun wadi, hay gooto waawataa wi'ude ko e innde an lootiradon maande kisiyee. ¹⁶ Mi lootii kadi beynguure Astefaana nden, ko heddii kon, mi andaa si mi lootii goddo goo. ¹⁷ Ko fii Almasiihu on nulaali lan fii lootugol maande kisiyee, kono ko fii feyningol Kibaaru Moyyo on. Dun non, hinaa immorde e kongudi faamu neddanke, fii wota *leggal altindiraangal Almasiihu on meerine.

Fii Faamu Aduna on e Faamu Allaahu on

¹⁸ Ko fii kibaaru leggal altindiraangal ngal no wa'ani wonbe mulude ben wa feetere. Kono enen, wonaabe dandeede ben, ko o bawgal Alla. ¹⁹ Ko fii no windii: «Mi mulay faamu faamube ben, mi mehindina hakkillaaji jooma-hakkil en.»^a

²⁰ Awa ko honto woni faamudo on, maa fensitoowo on, maa liddondirteedo e nguu jamaanu on woni? E hara Alla waylaali faamu aduna on, watti feetere?²¹ Ko fii, bay aduna on e faamu mun ngun andaali Alla e nder faamu Alla ngun, tawi no wela Alla ka o dandira gomdinbe ben waaju men wa'ungu wa feetere ngun. ²² Tawi *Yahuudiyankebe ben no landoo fii maandeeji hawniidi, *Gereekiyankebe ben kapun no dabba faamu ngun, ²³ kono enen hiden waajaade fii Almasiihu fempaado on. Dun no wonani Yahuudiyankebe ben peggal, wa'ani be wonaa Yahuudiyanke ben wa feetere, ²⁴ kono noddaabe ben, woni ko Yahuudiyanke, woni ko Gereekiyanke, Almasiihu on ko bawgal Alla e faamu makko kanko Alla. ²⁵ Ko wa'i

^a1.19 Isa. 29.14

wa feetere iwrunde ka Alla nden no buri faamu yimbe ben. Awa kadi, ko wa'i wa lo'ere iwrunde ka Alla nden no buri doole yimbe ben.

²⁶Miijitee, yo musibbe, no wonirnodon fewndo noddadon. E yeeso neddanke, tawi buy e hakkunde mon wonaa faamu be, maa marbe doole, maa rimbe. ²⁷Kono Alla subike piiji wa'udi wa feetudi e nder oo aduna fii hersingol faamu be ben, Alla subii kadi piiji wa'udi wa lo'udi e nder oo aduna fii hersingol dolnudi din. ²⁸Alla subii kadi piiji kaanudi din e oo aduna, din añaadi, din di wonaano huunde, fii mehindingol woodaadi din, ²⁹fii wota hay gooto mawnintino yeeso Alla. ³⁰E hin-le, ko kanko humindiri on e Iisaa Almasiihu on, on mo tawata ko e immorde e Alla wadiraai fii men faamu e peewal e *senaare e cottudi, ³¹fii, wano windori non:

«On mo no mantoo,

yo mantor Joomiraado on.»^b

2 ¹Min non, yo musibbe an, fewndo mi yahunoo ka mon fii fejjinangol on goonga Alla wirninoodo on, hinaa burnonndiro kongudi maa faamu mi yaari. ²Ko fii mi taw moyyaa ka mi ndaara goddun goo hakkunde mon, si hinaa Iisaa Almasiihu, fempaado on. ³Min tigi mido wonirnoo takko mon e noone no lo'iri e kulol e diwnol tiidungol. ⁴Kongol an ngol e waaju an ngun aldaano e kongudi weldi e faamu neddanke, kono ko wondunoodi e maandeeji bangindi bawgal Ruuhu Alla on, ⁵fii wota gomfinal mon ngal iwru e faamuuji yimbe ben, kono e bawgal Alla ngal.

Fii Faamu Haqiiqawu ngun

⁶Kono fow e mun, ko faamu men waajotoo mokobaabe ben, hara ko faamu ngu tawata hinaa ngu oo aduna, hinaa ngu laamuuji oo aduna kadi muloyteedi. ⁷Ko faamu Alla wonden waajaade, dun ko ngun wirninoongu e nder gundoo, ngu Alla ebbannoo fii darja men on ado aduna on tageede. ⁸Laamu woo e dii laamuuji oo

^b1.31 Yer. 9.23

aduna andaano dun. Ko fii si ɓe anduno, ɓe fempataano on Jom mangural. ⁹ Kono ko wano windori non:

«Ko Alla eɓɓani yidube mo ɓen kon,
kodun woni yiitere yi'aali, nowru nanaali,
e ko ɓernde nedɗanke miijaaki.»^c

¹⁰ Ko e men Alla ɓanginiri ɗun Ruuhu mun on.

Ko fii Ruuhu on hollay ko woni woo, hay piiji Alla lugguɗi ɗin. ¹¹ Ko hombo e hakkunde yimɓe ɓen andi ko woni e nedɗo, si hinaa ruuhu wondo e makko on. Ko wano non kadi, gooto waawataa andude ko woni e Alla, si wonaa Ruuhu Allaahu on. ¹² E hin-le enen, hinaa ruuhu oo aduna hendiden, kono ko Ruuhu iwrudo e Alla, fii no andiren ko Alla yediri en sulfu makko on kon. ¹³ En alaa wowlirde ɗun yewtereeji ɗi faamu nedɗanke jannata, kono kodi Ruuhu Allaahu on jannata ɗin, e nder sifanagol yimɓe ɓe on Ruuhu woni e mun ɓen haqiiqaaji iwrudi e on Ruuhu. ¹⁴ Kono nedɗo mo aldaa e Ruuhu Allaahu on jabataa piiji Ruuhu Alla ɗin, ko fii ko ɗi feetere e makko, o waawataa ɗi andude, ko fii ko Ruuhu Allaahu on ɗi taskortee. ¹⁵ Kono nedɗo mo Ruuhu Allaahu on woni e mun on taskoto ko woni woo, kono kanko hay gooto hewtaa taskagol mo. ¹⁶ E hoore ɗun:

«Ko hombo andi miijo Joomiraado on fii jannugol mo?»^d

E hin-le enen ko miijo *Almasiihu on jogiden.

Fii no Kurkaadi Alla ɗin Haani Wonirde

3 ¹ Kono min non, yo musibɓe, mi waawaali on yewtirde wa yimɓe ɓe Ruuhu Allaahu on woni e mun, kono ko wa jokkuba mbeleede ɓandu, e booboobe e telen-ma gomɗinal *Almasiihu on. ² Kobiraadan mi jonnunoo on, hinaa jaametee tedduɗo, ko fii on waawataano mo townude. Hay fewndo ɗoo non on waawataa

^c2.9 Isa. 64.3

^d2.16 Isa. 40.13

mo townude.³ Ko fii haa jooni ko on jokkuɓe mbeleede bandu. Bay nawliigu e yeddondiral no hakkunde mon, taw si hinaa on jokkuɓe mbeleede bandu? Kaa hinaa no nedɗanke fow wonirta non wonirdon?⁴ Si godɗo e mon wi'ii: «min ko mo mi Puulusa», oya on wi'a: «ko mo mi Apoloosi», taw si hara on gerdaali wa yimɓe aduna?

⁵ Awa ko hondun woni Apoloosi? E ko hondun woni Puulusa? Ko kurkaaduube ɓe gomɗinirdon sabu mun. Mo kala e maɓɓe kurkorani Joomiraado on golle de o halfini mo den.⁶ Min mi tutu, Apoloosi yarni, kono ko Allaahu on mawnini.

⁷ Kodun wadi hinaa tutudo on woni godɗun, hinaa kadi yarnudo on, kono ko Alla mawnindo on. ⁸ Tutudo on e yarnudo on no fota, mo kala e maɓɓe hendoto njoddi mun ndin tigi tippude e golle de ontigi wadi den.⁹ Ko fii, ko men gollidoobe fii Alla, onon ko on ngesa Alla, ko on darnoodi makko kadi. ¹⁰ Wano Alla yedirimmi moyɓere non, mi golliri wa faamudo fii darnugol, mi wadii ndelo ngon. Godɗo kadi darnii e hoore mun, kono yo mo kala reeno e noone no darnirta e hoore mun non. ¹¹ Fii ndelo ngon kan, hay gooto waawataa moyɓinde ndelo goo si wonaa wongo don ngon, e maanaa dun ko Iisaa Almasiihu on. ¹² E hin-le, si godɗo aru e darnirde e hoore ngon ndelo don maadi kanɗe maa kaalisi maa kaaye hittude maa ledde maa hudo kalin maa foron foɗɗe, ¹³ haray kuugal mo kala feenay. Nalaande nden ɓanginay dun, ko fii yiite ngen feɗɗinoyay ngal, nge ndarndoo kadi noone kuugal mo kala. ¹⁴ Si tawii kuugal ngal godɗo darni e hoore ndelo ngon tabitii, ontigi hebay njoddi. ¹⁵ Si tawii kuugal godɗo sumii, haray o fadii, kono kanko tigi o dadiray wa fuutiido yiite.

¹⁶ E on andaa ko onon woni suudu Alla ndun, awa kadi Ruuhu Allaahu on no hodi e mon? ¹⁷ Kala bonnudo suudu Alla ndun, Alla bonnay fii makko, ko fii suudu Alla ndun ko hormordu. Awa ko onon woni ndun. ¹⁸ Wota gooto daynito. Si godɗo e mon miijike wonde ko o faamudo e oo aduna fewndiido, haray yo o laato

«feetudo» fii yo o wonu faamudo. ¹⁹ Ko fii faamu oo aduna ko «feetere» yeeso Alla. Ko fii no windii:

«O nangiray faamuɓe ben yoyreeji mabbe ɗin.»^d

²⁰ No windii kadi:

«Joomiraado on no andi miijooji faamuɓe ben, himo andi kadi ko ɗi meere.»^e

²¹ Awa wota hay gooto mantor yimɓe ben. Ko fii fow ko onon jeyi: ²² woni ko Puulusa, woni ko Apoloosi, woni ko Petruusu, woni aduna on, woni ngurndan ɗan, woni mayde nden, woni piiji fewndiidi ɗin, woni piiji aroyooji ɗin, fow ko onon wonani. ²³ Awa kadi, ko on ɓe Almasiihu on, Almasiihu on kadi ko mo Alla.

4 ¹ Kodun wadi, yo men jogore wa kurkaadi *Almasiihu on e halfinaabe goongaaji Alla wirniidi ɗin. ² Awa halfinaabe ben non no toraa wonugol sella-findeeɓe. ³ Min non jaawoore nde jaawotommi nden e nde yimɓe ben jaawatammi nden hittaa e an, min tigi toode mi jaawitotaako. ⁴ Ko fii fondo an ngon ko laabungo, fii kala hinaa ɗun hollata ko mi feewudo, jaawoowo lan on ko Joomiraado on. ⁵ Kodun wadi, wota on jaawu huunde doo e saa'i on, maa doo e ardu Joomi on, on Weebitoowo ka ndaygu ko suudii kon ka niɓe, feɗɗina eɓɓooje berde ɗen. Ko fii mantoore mo kala aroyay immorde e Alla.

Fii Mawnintinaare ɓe Korenti ben

⁶ Musiɓɓe, mi huutorii ɗii nooneji doo fii wadangol on misal e hoore an min e Apoloosi. Ko nii andirton e amen wota mo yawtu ko windii kon, e wota gooto e mon mantor bambindirangol. ⁷ Ko fii ko hombo ɓurnu-maa? E ko hondun jogidaa ko a okkaaka? E si a okkaama, ko fii hondun mantantodaa, wa si tawii hinaa a okkaado?

^d3.19 Ayb. 5.13

^e3.20 Zab. 94.11

⁸ Dun-le wuren on haarii, awa kadi on aldii, on fuddike laamaade e baawo amen! Pellet mi faaleteno hara nun ko on lambe fii menen kadi no men laamodira e mon! ⁹ Ko fii no wa'animmii wa si tawii Alla wattirii men, menen *sahaabaabe ben baawo, wa jaawaabe happanaa wareede e yeeso dental ngal fow, ko fii men wonanii aduna on fow e malaa'ikaabe ben e yimbe ben jalnori. ¹⁰ Ko men jogoraabe wa feetube sabu Almasiihu on, kono onon ko on faamube sabu Almasiihu on! Ko men jogoraabe wa lo'ube, kono onon ko on dolnube. Ko on teddinaabe, kono menen ko men hayfinaabe! ¹¹ Haa jooni meden tampiri heege e donka e kolngal^f e piggal e yiilagol. ¹² Meden golliri juude amen den tigi haa meden ronki. Tuma men hoynaa woo, men du'anoo. Tuma men cukkaa woo, men wakkiloo. ¹³ Tuma men jo'aa woo, men jaabora no newori. Men woni tuundi oo aduna, men hawkaa e di fow, haa weetaango hande ngoo.

¹⁴ Hinaa fii hersingol on mi windiri dun, kono mido hajorde on wa faybe an be mi yidi. ¹⁵ Kodun wadi, hay si on heboyii guluuje sappo ardotoobe on fii no jokkiron laawol Almasiihu on, haray on alaa baabaabe buy. Ko fii, e telen-ma humondiral mon e Iisaa Almasiihu on, ko min wonti baaba mon e nder ko mi fejninani on Kibaaru Moyyo on kon. ¹⁶ Awa mi wakkilinii on yo on wonu jemboobe lan. ¹⁷ Kodun wadi si mi imminanii on Timotee, on mo tawata ko paykun an mo mi yidi, e sella-findeejo e telen-ma Joomiraado on. O andintinay on laawi andin fow e telen-ma Almasiihu on, wano mi janniri di non hen fow e nder *mofte den fow kadi.

¹⁸ Wobbe e mon mawnintinike wa si tawii mi yilititotaako ka mon. ¹⁹ Kono mi yahay ka mon ko neebaa, si Joomiraado on jabii. Hinaa kongudi mawnintiniibe ben tun mi andoyta, kono ko bawgal mabbe ngal kadi. ²⁰ Ko fii *laamu Alla ngun

^f4.11 Maa: «kolndan».

wonaa haalaaji, kono ko bawgal. ²¹ Ko hondun faaladon? Ko yo mi yaadu ka mon e sawru, kaa ko giggol e newaare?

Fii Hiwugol Moftal ngal

5 ¹ Awa saa'i woo jiiɓaare goo no naneede hakkunde mon, hara ko jiiɓaare nde yi'etaake hay ka ɓe gomɗinaa ɓen, hay godɗo e mon no murtini ɓeyngu ben mun!

² Onon e ndee mawnintinaare mon! Hidon haanunoo yoomude! Suuton on wadudo ngal kuugal e hakkunde mon. ³ Min oo mo wondaa e mon ka ɓandu, kono wondudo e mon ka ɓernde, mi jaawirii wadudo sifa ngal kuugal on toode wa si mido wondi e mon. ⁴ Awa fewndo mottondirdon e innde Iisaa Joomi on, tawi mido wondi e mon ka ɓernde, wondude e bawgal Iisaa Joomi men on, ⁵ yo on neddo accide e Ibuliisa fii no jikku makko junuubankeejo on halkiree, e fii no ruuhu makko on dandiree jande ardu Joomi men on.

⁶ Nden mawnintinaare mon moyɗaa. E hara on andaa lewen seeda nii no yurina farin jiiɓaado fow?⁷ Seedee e lewen kidɗo on, fii no laatoron farin jiiɓaado keso, ɓay ko on ɓe aldaa e lewen. Ko fii *Almasiihu on, ngin baalii men layya fii *Juldeere Yawtaneede nden, hirsama. ⁸ Awa wota en wadir juldeere nden lewen kidɗo, maa lewen bonki e bone, kono wadiren nde bireedi laaɓal e goonga, ɗe aldaa e lewen.

⁹ Mi windanii on ka nder ɓatakuru an wonde, wota on humondir e jeenoobe ɓen. ¹⁰ Kono hinaa fii mido faalaa wi'ude bee tun selon ɓee yimɓe oo aduna, jeenoobe, maa reeredube, maa jattoobe, maa rewoobe sanamuuji. Si hinaa ɗun, haray bee yalton e oo aduna. ¹¹ Ko mi windani on kon jooni, ko wota on humondir e godɗo wi'udo ko musidɗo mon e gomɗinal, hara ko jeenoowo, maa ndeereero, maa rewoowo sanamu, maa hoynoowo, maa mandiloowo, maa jattoowo, e hay wota on jaamidu toode e sifa on neddo.

¹² Ko fii hondun mi jaawanta be gomdinaa ben? Hinaa onon woni jaawoobe gomdinbe ben?¹³ Be gomdinaa ben kan, Alla jaaway be. Awa yaltinee bondo on hakkunde mon.⁸

Fii Yaafondiral Gomdinbe Ben

6 ¹ Si goddo e mon lurririi e goddo, e hara o suusay wullitaade e be feewaa ben, o acca yimbe Alla ben? ² E on andaa yimbe Alla ben jaawoyay oo aduna? Si tawii ko onon haani jaawude aduna on, hara on waawataa jaawugol haajuuji di hittaa din? ³ E on andaa en jaawoyay malaa'ikaabe ben? E ko hondun non hadata jaawen haajuuji oo aduna? ⁴ Awa si tawii hidon mari lurral hakkunde mon fii haajuuji aduna din, hara ko yimbe be *moftal ngal hayfini ben wadoton jaawoobe? ⁵ Ko fii hersingol on mi wowliri dun. Taw si hay gooto faamudo, waawudo jaawude hakkunde musibbe mun alaa hakkunde mon? ⁶ E hin-le goddo no wullitaade e hoore musiddo mun yeeso be gomdinaa ben!

⁷ Onon non, ko ko wadi haa jaawindirfon kon holli wonde on foolaama few. Sitta nde wadafon bone, maa hippafon.⁸ Kono ko onon woni wadude angal peewal ngal, jatta beya, e hin-le ko musibbe mon.

⁹ Wota on daynito! E on andaa boyliibe ben maraa gebal ka *laamu Alla? Hinaa jiiibiibe ben, hinaa kadi rewoobe sanamu ben e jeenoobe ben e worbe waditiibe rewbe ben e worbe jinoobe worbe ben ¹⁰ e wuybe ben e himmuibe ben e mandiloobe ben e hoynoobe ben e jattoobe ben, woni ko mari gebal ka laamu Alla. ¹¹ Awa kodun wobbe e mon wonnoo. Kono Ruuhu Alla men on lootii on, *labbinii on, o jogorii on feewube e innde Iisaa Almasiihu Joomi on.

⁸5.13 Yaj. 17.7

Fii Wodditagol Jinaa

¹²Midó newnanaa fow, kono hinaa fow nafata. Midó newnanaa fow, kono mi accataa ko woni woo waawammi. ¹³Neemaaji dín ko fii reedu, reedu ndun kadi fii neemaaji dín, Alla kadi mulay di fow. Awa kadi bandu ndun hinaa fii jinaa, kono ko ndu fii Joomiraado on, Joomiraado on kadi fii bandu ndun. ¹⁴Awa kadi Alla, on Immintindo Joomi on, immintiniray en bawgal makko ngal. ¹⁵E hara on andaa wonde koballi mon dín woni tere *Almasiihu on? E hara mi yettay tere Almasiihu on, mi yubbindira e cagaajo? Pellet oo'o! ¹⁶E on andaa kadi, mo yubbindiri hoore mun e cagaajo, haray kanko e makko kobe bandu wooturu? Bay no windii: «Kambe dido be wonay gooto.»^{h17} Kono, on humondirdo e Joomiraado on, haray kanko e makko ko be ruuhu gooto.

¹⁸Wodдитеe jinaa on! E junuubu goo mo neddo wadata, hara on junuubu hinaa tabitoowo ka bandu. Kono on jokkudo jinaa, haray kobandu makko ndun tigi o woni wadande junuubu. ¹⁹E hari on andaa dundoo? Ko bandu mon ndun woni suudu *Ruuhu Seniido wondo e mon on, on mo Alla okki on. Hinaa onon jeyi hoore mon, ²⁰ko fii on sooditaama coggu sattungu. Awa teddiniree Alla balli mon din.

Fii Desal e Sunningol

7 ¹Jooni feyyen e ko windandon mi kon. No moyyani gorko hara o meemaali debbo. ²Kono non fii reenagol e jinaa, yo mo kala hebu beyngu, debbo kala heba moodi. ³Gorko on jonnita beyngu mun ko handi kon, debbo on kadi wano non e telen-ma moodi mun. ⁴Ko fii debbo on jeyaa bandu mun ndun, kono ko moodibbo on, gorko on kadi wano non, o jeyaa bandu makko ndun, kono ko beyngu makko jeyi ndu. ⁵Wota on salondir, si hinaa e saa'i nanondiral mon, fii no hebiron saa'i no tororon Alla. Bawto dun yiitidon, fii wota Ibuliisa foolir on angal waawugol

^h6.16 Fud. 2.24

hoore mun.⁶ Kono mi wowliraali ðun wa si ko yamiroore, kono ko ko newnaa.

⁷ Midó yelii yo nedðo fow wa'u wa an min, kono mo kala no mari dokkal feerewal, ngal Alla yedi ðun, mo kala e noone goo.

⁸ Be resaa ðen non e keynguube ðen, mi wi'ay no moyýani ðe no ðe wa'ira wa an min. ⁹ Kono si ðe waawataa hoore maðbe, ko yo ðe resu, ko fii ko resugol ðuri bittorgol faale feyýitudo. ¹⁰ E telen-ma yettindirbe ðen non, e hino ko mi wi'ata kon, (hinaa non min yamiri, kono ko Joomiraado on), wota debbo sertu e moodi mun. ¹¹ Si kanko debbo on non o aru e serteede, yo o joodo hara o yettaaka, maa o moyýintinida e moodi makko. Awa kadi wota gorko jonnitu beyngu mun.

¹² Fii beya, (ðundoo ko min wowli, hinaa Joomiraado on), si musiddo goo no mari debbo mo gomdinaa, hara on debbo no yidi wondugol e makko, wota o seedu e makko. ¹³ Si tawii kadi debbo no mari moodibbo mo gomdinaa, hara on gorko no yidi wondude e on debbo, wota o seedu e moodi makko. ¹⁴ Ko fii moodibbo mo gomdinaa ko jeyaado Alla sabu debbo makko gomdindo on, debbo mo gomdinaa on kadi ko jeyaado Alla sabu moodibbo makko gomdindo on. Si hinaa ðun, biðbe monðen wonay wodfondirbe e Alla, e hara-le wurin ko ðe ðadondirbe e Alla. ¹⁵ Si tawii mo gomdinaa on no catii e seedugol, yo gomdindo on newnan mo ðun. Ko fii hay huunde wadfaaki musiddo gomdindo e ðun, Alla ko noddiri en ko wuurugol e nder ðuttu. ¹⁶ E hoore ðun, ko honno debbo andirta si o danday moodi makko? Maa si gorko danday beyngu mun?

¹⁷ Ko woni tun, yo mo kala jokkir no Joomiraado on wadirani ðun non, e noone noddaandu ndu o hebiri Alla ndun. Ko nii mi yamiriri e nder *mofté den fow.

¹⁸ On mo noddeede mun tawi sunninaama, yo o wonir no o sunniraa non. On mo noddeede mun tawi sunninaaka, wota o etosunnineede. ¹⁹ Sunninelgol* ngol wonaa huunde, angal sunninelgol kadi wonaa huunde, kono kodoftagol yamirooje Alla ðen woni godðun. ²⁰ Yo mo kala wonir no wonirnoo non fewndo o noddaa. ²¹ Si tawii fewndo noddadaa ko a jiyaado, wota a aanu, kono si tawii hida

waawi rindude, haray eto. ²² Ko fii jiyaado mo Joomiraado on noddi, haray o wonii mo Joomiraado on rindini. Ko wano non kadi, dimo mo Joomiraado on noddi, haray o wonii jiyaado *Almasiihu on. ²³ Awa on sottiraama coggu sattungu, wota on wontu maccube yimbe ben. ²⁴ Yo mo kala, yo musibbe, woniran Alla noone no wonirnoo non wa fewndo ko o noddaa.

²⁵ E telen-ma be yettaali yettaaka ben, wonaa yamiroore Joomiraado on mi hendii. Kono ko fewjoore an nden mi woni on jonnude, wa neddo sella-findeejo sabu yurmeende Joomiraado on. ²⁶ E hino ko mi mijii no moyyi kon, sabu satteendeeji fewndiidi din: no moyyani neddo ka o wonira no o woniri non. ²⁷ Si hida tiggunoo, wota a dabbu seedigal. Si a tiggaa, wota a dabbu tiggugol. ²⁸ Kono, si a resii, haray a wadaali junuubu. Si jiwo kadi resaama, haray o wadaali junuubu. Kono non yimbe resindirbe ben fottay e tampereaji, mi faalaa on dandude di.

²⁹ E hino ko mi wi'ata kon, yo musibbe an: saa'i on ko rabbidudo. Jooni, on mo no mari suddiido, yo wa'u wa mo alaa. ³⁰ Ben wonbe wullude, yo wa'u wa si be alaano wullude. Ben wonbe kadi weltaade, yo wa'u kadi wa si be alaano weltaade. Soodoobe ben kadi, yo wa'u wa si be maraano, ³¹ e ben wonbe huutorde oo aduna, ka haqiiqa, yo wa'u wa si tawii be alaano huutorde. Ko fii mbaadi oo aduna feyyay.

³² E hin-le mi faalaaka yo on wonda e annde. On mo tiggaali, ko fii haajuuji Joomiraado on hittini, no o weltinira Joomiraado on. ³³ On resudo non, ko fii haajuuji aduna hittini, no o weltinira beyngu makko. ³⁴ Haray himo senditii. Wano non, debbo mo resaaka maa jiwo, ko fii Joomiraado on hittini, fii no o laatora laabudo ka bandu e ka ruuhu. Debbo resaado on non ko fii haajuuji oo aduna hittini, no o weltinira moodi makko. ³⁵ Ko nafa mon mi wowliri dun, hinaa fii faadinangol on, kono ko fii addugol on e ko haani kon e ko laabi kon, e no humoron e Joomiraado on, hara on dillaali.

³⁶On mo no tanyɛnii ko lo'udo e fee jiwo mo o yami, feyɛudo duubi kellefuyee, o tawi yettindirgol e makko no moyɛyɛ, yo o wadu ko o faalaa kon, haray o wadaali junuubu si be resindirii. ³⁷Kono on anniyiido ka bernde mun haa tabiti wonde o tiggataa on jiwo, hara ko e yidi makko kanko tigi, e hoore himo wawti faaleeji makko, haray o wadii ko moyɛyɛ. ³⁸Awa ko nii woniri: on tiggudo jiwo mo o yami on, haray o wadii ko moyɛyɛ, on mo tiggaali jiwo mo o yamaynoo on kadi, burtu moyɛinde.

³⁹Debbo no humondiri e moodi mun fannin moodi makko no wuuri. Kono si gorko on maayii, haray no newanii mo reseede ka o faalaa woo, ko woni tun, ko yo taw ko no yaadiri e faale Joomiraado on. ⁴⁰E miijo an, ka o burata hettaade, ko si o wonirii wano o woniri non, bay min kadi mido tanyɛnii Ruuhu Allaahu on no e an.

Fii Naamugol Tebbeeli Sakkanaadi Sanamuuji

8 ¹E telen-ma tebbeeli sakkanaadi sanamuuji, hiden andi wonde en fow hiden mari gandal, e hin-le gandal adday mawnintinaare, kono giggol tiidinay. ²On mo no sikki no andi godɗun, haray fahin o andaali ko honno haanaa andireede. ³Kono si godɗo yidii Alla, haray Alla no andi mo. ⁴Fii telen-ma huutorgol tebbeeli sakkanaadi sanamuuji ɗin, hiden andi wonde sanamu wonaa godɗun tigi e oo aduna, ko Alla gooto tun woodi. ⁵Pellet no woodi piiji reweteedi duudufi ka kammu e ka leydi, jogoraadi wa si tawii ko allaabe maa joomiraabe. ⁶Kono enen ko Alla gooto marden, on Baabaajo, on mo kala huunde iwri e mun, e on mo wonanden, e Joomi gooto, ɗun ko Iisaa Almasihu on, on mo piiji ɗin fow woniri, e on mo wonirden.

⁷Kono fow alaa ngal gandal.Kodun wadi, ben wowntube sanamuuji, haa jooni si no jaamude ngun teewu anditay fii ko sakkaa kon. Nde tawnoo bernde maɓɓe

nden no lo'i, dɔn tuuninay be.⁸ Hinaa neema bannata en e Alla.Si en jaamaali, dɔn dɔyɔtataa en huunde, si en jaamii kadi, dɔn beydataa en huunde.

⁹ Ko woni tun, reenee fii wota ko newnanadɔn wadugol kon wonan lo'ube ben peggal. ¹⁰ Ko fii si godɔo aru e yi'ude ma, an oo jooma gandal, hida nafoo e nder juulirde ka sanamuuji rewetee, taw si nden bernde makko lo'unde poodataa mo jaamugol tebbeeli sakkanaadi sanamuuji? ¹¹ Dun haray on lo'udɔ mulirii sabu <gandal> maa ngal, dɔn ko on musidɔo mo *Almasiihu on maayi fii mun! ¹² Si on wadirii non junuubu e telen-ma musibbe ben, e nder barmingol bernde maɓbe lo'unde nden, haray on wadii junuubu e telen-ma Almasiihu on. ¹³ Ko dɔn wadi, si tawii jaametee wonay sabu peggal musidɔo an, haray mijnaamataa teewu hande kadi, fii wota mi libu musidɔo an on.

Fii ko Haanani Sahaabaajo

9 ¹ E hara hinaa mi dimo? Kaa hinaa mi *sahaabaajo?Kaa mi yi'aali Iisaa Joomi men on?Kaa hinaa on kuugal an e telen-ma Joomi on?² Hay si tawii hinaa mi sahaabaajo fii wɔbbe ben, onon bete ko mi sahaabaajo fii mon. Ko fii ko on maande sahaabankaaku an ngun e telen-ma Joomi on.

³ E hino dɔo ko mi jaaborta jaawoobe lan ben kon: ⁴ E hara haananaa men ka men jaama men yara? ⁵ Kaa haananaa men ka men yaada e debbo amen mo men kafidi diina, wano beya sahaabaabe woni warrude non, e musibbe Joomi men on, e Petruusu? ⁶ Kaa ko min tun e Barnabaasi haani gollude fii no men wuurira? ⁷ Ko suufaajo hombo fawtotoo hoore mun e nder suufayaagal mun? Ko hombo tutata leggal *wiiju, hara jaamataa bibbe maggal on? Ko ngaynaako hombo aynata wuro, ronka yarude biraadan dɔn daabeeji?

⁸ Ko mi wowlata kon wonaa ko iwri e miijooji neddanke, ko fii Sariya on kadi ko dɔn wi'i. ⁹ Ko fii no windii ka Sariya Muusaa:«Wota mo buuma hunduko ngaari

ndin nde hindi yaabana ðun maaro.»ⁱ E hara Alla no aanidi e ga'i ðin? ¹⁰ Kaa ko fii men o wowlirani nii? Hiiyii, ko sabu men enen ðun windiraa. Mo no remude yo remir tama'u, e on mo no yaabude yo yaabir tama'u hebugol gebal.¹¹ Si tawii men aawii ko iwri e Alla hakkunde mon, taw si haanaa ka men sojita e mon piiji aduna? ¹² Si tawii ðun no haanani wobbe goo e hoore mon, haray menen ittii e sikke.

Kono men huutoraali kon ko haanani men. Kono meɗen ronditii fow, fii wota men fallu Kibaaru Moyyo *Almasiihu on.¹³ E on andaa wonde ben wadoobe golle *juulirde mawnde nden ko e ðun jaamata, e wonde golloobe ka *layyorde ben kadi no mari gebal ka layyorde? ¹⁴ Ko wano non kadi Joomi on no yamiri wonde feɗɗinoobe Kibaaru Moyyo on ko e makko wuurata.

¹⁵ Min non mi huutoraali hay huunde e ðin haanandi lan, awa mi windiraali ðun kadi fii yo mi newnane. Ko fii mayde nden no buranimmi edii goddo ittude lan e ndee huunde nde mi mawninorta. ¹⁶ Ko fii hewtaa ka mi mantora yottingol Kibaaru Moyyo on, bay ðun ko ko waddii mi. Si mi feɗɗinaali Kibaaru Moyyo on, bone wonanay lan. ¹⁷ Si tawii ko e hoore anniyee mi woni wadinde, haray mido mari njoddi. Si tawii non mi fawa wadugol ðun, haray mi waday woni golle de mi halfinaa.¹⁸ Awa ko hondun non jooni woni njoddi an ndin? Ko waajagol fii Kibaaru Moyyo on e baawo yantugol njoddi e tortagol ko haanani waajotoodo kon.

¹⁹ Ko fii, fii kala mido rindi e hoore wondo woo, mi waditii maccudo fow fii no adadu burdo mawnude on hebora. ²⁰ E telen-ma Yahuudiyankeebe ben, mi wa'a wa Yahuudiyankeejo, fii no mi hebira Yahuudiyankeebe ben. E telen-ma wonbe e ley Sariya on kadi, mi wa'a wa wondo e ley Sariya on, fii no mi hebira wonbe e ley Sariya on ben, fii kala min tigi hinaa mi wondo e ley Sariya on. ²¹ E telen-ma be alaa e ley Sariya on ben kadi, mi wa'a wa mo alaa e ley Sariya on, fii no mi hebira

ⁱ9.9 Yaj. 25.4

be alaa e ley Sariya on ben, e hin-le min tigi wonaa wonde mi alaa e ley Sariya Alla on, kono mido e ley Sariya Almasiihu on.²² Mi lo'ida e lo'ube ben fii no mi hebira lo'ube ben. Mi wonii fow e telen-ma yimbe ben fow, fii no gasirta woo mi wona sabu dandugol wobbe.²³ Mi wadiri fow sabu Kibaaru Moyyo on, fii no mi hebiroya gebal.

²⁴E on andaa? Wonbe foolotirde e dogudu ben fow no dogude, kono ko gooto foolata heba njoddi. Awa dogiree wano non, fii no hebiron njoddi.²⁵ Kala foolotirteedo waday kala noone eltal bandu, fii no o hebira *meetelol ngol luttataa, kono enen ko meetelol luttoowol.²⁶ Min non mido dogude, kono hinaa dogudu meereeru. Mido uttaade, kono hinaa fii uttagol hendu ndun.²⁷ Liddu dun on non, mido yangude bandu an ndun, mido waawi ndu, fii nde mi gaynoyi waajaade beya, min tigi wota mi pottine.

Mise Yettaade e Taariika Isra'ilayankeebe ben

10¹ Musibbe an, mi faalaaka yo on yejjitu wonde baabiraaabe men ben fow wonno e ley duulere, be fow be tayitiri ka baharu.² Be fow be lootaa maande gomdinal ka duulere e ka baharu e nder humondiral e Muusaa.³ Be fow be jaami jaamete gooto iwrufo e Alla.⁴ Be fow be yari njaram gootan iwruɗan e Alla, ko fii ko e fetere iwrunde e Alla jokkunoonde be nden be yaraynoo. Ko Almasiihu on wonnoo nden fetere.⁵ Kono burbe ben e mabbe weltinaano Alla, kodun wadi si be maayi ka wulaa.

⁶ Awa dun fow ko wadiri ko fii hollugol en mise, fii wota en hebu faaleeji bondi wano be hebirnoo non.⁷ Wota on wonu rewoobe sanamu, wano wobbe wonirnoo e hakkunde mabbe, wano windori non: «Jamaa on joodii fii naamugol e fii yarugol, bawto dun be immii fii fijirgol jiibaare.»⁸ Awa wota en jokku jinaa, wano wobbe e mabbe wadirnoo non, haa guluuje noogay e tato maayi jande wootere.

^j10.7 Egg. 32.6

⁹ Wota en ndarndo *Almasiihu on, wano wobbe e mabbe ndarndornoo non, ben be bolle mulunoo. ¹⁰ Wota on nermu, wano beya nermirnoo non, ben be malaa'ikaajo muloowo on warunoo.

¹¹ Dun, ko hebiri be ko fii yo wonan en misal, windiraa kadi fii hajagol en, enen bee tawaabe ka lannoode aduna. ¹² Kodun wadi, on mo no sikki no darii, yo o reeno wota o yanu. ¹³ Ndarndannde woo hebaali on nde goddo goo hebaali. Alla ko Sella-Findeejo, o newnataa ndarndedon toonin doole mon den, kono e nder ndarndannde nden o adday feere no sortoron e mun, e no waawiron nde dardorde.

¹⁴ Kodun wadi, yo yibbe an, dogee rewugol sanamu. ¹⁵ Ko wa yimbe faamube mi woni on yewtirde, onon tigi jaawee ko mi wi'i kon. ¹⁶ Jardukun du'aa kun wonden du'orde kun ko yubbondirkun e yiiyan Almasiihu on. Bireedi mo wonden tayitude on, ko yubbondirdo e bandu Almasiihu on. ¹⁷ Bay ko bireediwal gootal woodi, enen e duudude men ko en bandu wooturu. Ko fii en fow hiden hawti bireediwal gootal.

¹⁸ Ndaaree bee *Isra'iilayankeebe wonbe jaamude daabeeji sakkaadi din. Hinaa yubbondirbe e *layyorde nden? ¹⁹ Awa ko hondun mi woni wi'ude? Wonde tebbeeli sakkaadi fii sanamuuji din ko goddun? Kaa sanamuuru ko goddun? Oo'o! ²⁰ Kono kon ko rewoobe sanamuuji ben woni sakkaade, ko jinnaaji din be woni sakkanaade, hinaa Alla. E hin-le mi faalaaka yo on humondir e jinnaaji din. ²¹ On waawataa yarirde jardukun Joomi on, yariron kadi jardukun jinnaaji din. On waawataa hebude ka jaametee Joomi on, hebon kadi ka jaametee jinnaaji din. ²² En faalaa memminde nawliigu Joomiraado on? Kaa en buru mo dolnude?

Fii Hettaare Wonannde Gomdindo on

²³ Fow no newnaa, kono hinaa fow wondi e nafa. Fow no newnaa, kono hinaa fow tiidinta. ²⁴ Wota gooto dabbu nafa mun on, kono yo dabbu fii heddiibe ben.

²⁵Naamee kala teewu ko yeeyetee ka luumo, hara on sikkitaaki ka bernde mon.

²⁶Ko fii: «Leydi ndin e kala ko ndi wondi ko Joomiraado on wonani.»^k

²⁷Si tawii mo gomɗinaa saatinii on, e hin-le hidon faalaa yahude, naamee kala ko weebitanoyadon, hara on sikkitaaki ka bernde mon. ²⁸Kono si godɗo wi'ii on: «Dundoo ko ko ittaa sadaka», haray wota on jaamu sabu on andindo on e sabu bernde nden. ²⁹Hinaa fii bernde mon nden mi woni yewtude doo, kono ko fii bernde oya nden. Awa ko fii hondun ndimankaaku an ngun jaawirtee bernde oya nden? ³⁰Si mi jarnii Alla e nder ko mi jaamata kon, haray ko hondun mi felirtee fii on jaamete mo mi jarni Alla fii mun?

³¹Woni on jaamay, woni on yaray, woni kala ko wadoton, wadiree piiji ɗin fow fii mangu Alla ngun. ³²Wota on wonan hay gooto peggal, woni *Gereekiyankeebe ben, woni Yahuudiyankeebe ben, woni *moftal Alla ngal. ³³Wano mi woniri weloowo wondo woo e ɗi fow non, mi alaa ɗaɓɓude nafa an on, kono ko nafa burɓe duudude ben fii no ɓe dandiree.

11

¹Awa jembee lan, wano min kadi mi woni jembirde *Almasiihu on non.

Fii no Godɗo Haani Wonirde e nder Rewugol Alla

²Mi mantii on fii ko on yejjitaali fii an kon e ɗi fow, e ko maanditidon janndeeji ɗin kon, wano mi hewtiniri on ɗi non. ³Kodun wadi si mido faalaa yo on andu wonde Almasiihu on ko hooreejo kala nedɗanke, gorko kadi ko hooreejo e fee beyngu mun, Alla kadi ko hooreejo e fee Almasiihu on. ⁴Kala gorko hippiiɗo kufune, nde no toroo Alla, maa no haala ko Alla longini ɗun, haray o yawike hoore makko^m. ⁵Ko wano non kadi, kala debbo wondo toraade Alla maa haalude ko Alla longini ɗun, hara o taaraa, haray o yawike hoore makkoⁿ. Haray no wa'i

^k10.26 Zab. 24.1

^m11.4 Maa: «o yawike hooreejo makko on».

ⁿ11.5 Maa: «o yawike hooreejo makko on».

wa si tawii kanko debbo on himo fembii. ⁶ Ko fii, si debbo taaraa, haray yo o tayu sukundu makko ndun. Ko fii, si no hersinanii debbo ka sukundu makko ndun tayee, maa o femboo, haray yo o tiggo. ⁷ Kono duhiido haanaa ka hippoo, ko fii ko o mbaadi e darja Alla, debbo non ko darja gorko. ⁸ Kodun wadi, gorko hinaa e debbo suutaa, kono ko debbo suutaa e gorko. ⁹ Awa kadi gorko hinaa sabu debbo tagiraa, kono debbo ko sabu gorko tagiraa. ¹⁰ Kodun wadi, sabu malaa'ikaabe ben, debbo no haani hebude ka hoore mun maande laamu ngu o woni e ley mun ngun. ¹¹ Kono e telen-ma humondiral men e Joomiraado on, debbo gasataa e baawo gorko, gorko kadi gasataa e baawo debbo. ¹² Ko fii, ko wano debbo suutiraa e gorko non, ko wano non kadi tawi ko debbo dajata gorko, dun fow non ko immorde e Alla.

¹³ Naawee dun onon tigi. E hara no hawri ka debbo toroo Alla, hara o taaraa? ¹⁴ E hara aduna on tigi faaminaali on wonde no hersinanii gorko ka o accita saayannde? ¹⁵ Kono hebugol sukundu ko darja debbo, ko fii sukundu ndu o yedaa ndun ko ko o buumora. ¹⁶ Si tawii goddo no faalaa warrude noone goo, enen en alaa on naamu, *mofta Alla den kadi alaa on naamu.

Fii Nafakkaari Joomi on

(Mat. 26.26-29; Mrk. 14.22-25; Luk. 22.15-20)

¹⁷ E nder wadugol non dee yamirooje yeeso doo, alaa ko mi mantira on e nder ko mottondirton kon, hara hinaa fii ko buri moyyude, kono ko fii ko buri bonude.

¹⁸ Ko adii kon non, mi nanii nde mottondirdon woo sendondiral waday hakkunde mon. E banje goo, dun no henanimmi. ¹⁹ Bee yeddondire wona hakkunde mon, fii no holniibe ben feenjira e hakkunde mon. ²⁰ Jaka nde mottondirdon woo, hinaa fii jaamugol *nafakkaari Joomi on. ²¹ Bay nde hidon jaama, mo kala kutoto nafakka mun on, jaama, hara goddo goo no weelaa, oya kajun no mandili. ²² E hara on alaa cuudi ka jaamon e ka yaron? Kaa on hayfinay woni moftal Alla ngal,

hersinon be alaa huunde ben? Ko hondun mi wi'ata on? Mi mantay on? Mi mantataa on e dun!

²³ Ko fii, ko ko mi hebiri Joomi on kon mi hewtini on. E nder jemma mo Iisaa Joomi on janfaa e mun on, o yettuno bireedi, ²⁴ o jarni Alla, o tayiti, o wi'i: «Dundoo ko bandu an, wonandu on ndun nii, wadee dundoo maande ko anditiron fii an.»²⁵ Ko wano non kadi, bay be gaynii jaamude, o yetti jardukun wadorkun njaram, o wi'i: «Kun jardukun ko maande fii *ahadi heyri tippundi e yiiyan an dan, wadee dundoo maande ko anditiron fii an, saa'i nde yaroton e mun woo.»²⁶ Ko fii nde jaamoton oo bireedi woo, yaron e kun jardukun, on wowlay fii mayde Joomi on haa jande o artoyi.

²⁷ Kodun wadi, kala onjaamudo on bireedi, yari e kun jardukun Joomi on, hara ko no haaniraa, o wonay felniido e telen-ma bandu e yiiyan Joomi on. ²⁸ Awa, yo mo kala miijitano hoore mun si o jaama on bireedi, maa o yarira kun jardukun. ²⁹ Ko fii kala on jaamudo yari e baawo anditugol bandu Joomi on, haray ontigi jaamii yarii jaawoore jaawaynde dun kapun tigi. ³⁰ Kodun wadi si no e hakkunde mon nawnube buy e kitasoloobe buy, e on mayraama wobbe. ³¹ Si enen tigi en jaawitike, en jaawoytaake. ³² Kono Joomiraado on no jaawude en donkina, fii wota en jaawidoye e aduna on. ³³ Kodun wadi, yo musibbe an, nde mottondirdon fii nafakkaari ndin woo, habbondiree. ³⁴ On mo tawi no weelaa, yo jaamu ka mun, fii wota on mottondir fawon jaawoore e hoore mon.

Mi jaaboyto deya lande, nde mi hewtoyi.

Fii Dokke Ruuhu Seniido on

12 ¹ E telen-ma dokke iwrude e Ruuhu Alla den, yo musibbe an, mi faalaaka yo on ronku andude dun. ² Hidon andi fewndo ko on gomdinaa, hidon selnaa, nawraa e sanamuuji mbobooji. ³ Ko dun wadi si mi wi'ay on: kala mo Ruuhu Allaahu on

ardii e nder ko o wowlata kon, wi'ataa: «Iisaa ko hudaado.» Hay gooto kadi waawataa wi'ude: «Iisaa ko Joomi», si hinaa *Ruuhu Seniido on ardii mo.

⁴ Dokke den no serti, kono Ruuhu Allaahu on ko gooto. ⁵ Balle den kadi no serti, kono Joomiraado on ko gooto. ⁶ Golleeji din kadi no serti, kono ko Alla gooto on woni wadude di fow e yimbe ben fow.

⁷ E hin-le, mo kala ko Ruuhu Allaahu on fejnini e mun kon ko dokkal fii nafa fow. ⁸ Ko dun wadi, Ruuhu on yeday goddo on kongol faamu, on Ruuhu gooto yeda oya on kongol gandal, ⁹ on Ruuhu gooto yeda goddo goo gomdinal, on Ruuhu tigi yeda goddo goo jawndugol, ¹⁰ goddo goo dokkal fii wadugol kaawakeeji moyyi, goddo goo haalugol ko Alla longini dun, goddo goo gandal fii sendindirgol noone ruuhuuji, goddo goo noone *haalaaji janani, goddo goo nantingol din haalaaji. ¹¹ Ko on Ruuhu gooto bajjo wadata dii piiji fow, senditana mo kala e ko mun, wano o yidiri non.

¹² Kodun wadi, wano tawiri non bandu ndun ko wooturu, hindu mari tere buy. Tere bandu ndun non kadi e duudude, kobandu wooturu de mari. Ko wano non wonirani *Almasiihu on. ¹³ Ko fii ko Ruuhu gooto *lootiraden fii wonugol bandu wooturu. En fow yarnaden Ruuhu Alla gooto on, woni non Yahuudiyankeebe ben, woni *Gereekiyankeebe ben, woni jiyaabe ben, woni rimbe ben.

¹⁴ Ko fii bandu ndun wonaali teral gootal, kono tere buy. ¹⁵ Si koyngal ngal wi'ii wonde: «Bay hinaa mi jungo, mi tawdaaka e bandu ndun», dun ittataa ko ngal teral e bandu ndun. ¹⁶ Si nowru ndun kadi wi'ii wonde: «Bay hinaa mi yiitere, mi tawdaaka e bandu ndun», dun ittataa ko ndu teral e bandu ndun. ¹⁷ Si tawno bandu ndun fow wonno yiitere, ko honno ndu naniraynoo? Maa si bandu ndun fow wadano nowru, ko honno ndu faamiraynoo barngol? ¹⁸ Kono Alla wadi teral kala e bandu ndun no o faaliraa non. ¹⁹ Si fow wonno teral gootal, ko honto bandu ndun wonaynoo? ²⁰ Jooni non, tere buy no woodi, kono bandu ndun ko wooturu.

²¹ Yiitere nden waawataa wi'ude jungo ngon: «Mi hatonjinaa e maa.» Hoore nden kadi waawataa wi'ude koyde den: «Mi hatonjinaa e mon.»²² Dun-le toode, tere bandu wa'ude wa si no buri lo'ude den, ko den woni hittude,²³ e de tanyiniden no buri hayfude den e bandu ndun, hiden hundiri de teddungal burngal tiidude. E hin-le tere men burde hersinaade den, koden burden surrude,²⁴ de hersinaaki den kan hatonjinaa e dun. Alla wadiri bandu ndun e noone mo bureten teddinirde nakkiraade den,²⁵ fii wota liddondiral wadu e nder bandu ndun, kono yo de nafindir.²⁶ Si teral tampii, deya tere fow tampiday e maggal. Si teral gootal teddinaama, deya tere fow weltoday e maggal.

²⁷ Ko on bandu Almasiihu on, mo kala e mon ko teral e mayru. ²⁸ Awa, ko Alla adii wadude e nder *moftal ngal, ko *sahaabaabe, dimmun dun ko haaloobe ko Alla longini dun, tammun dun ko jannoobe, bawto dun dokkal fii kaawakeeji moyyi, e dokke fii nawndugol, e wallugol, e ardagol, e wowlugol e noone haalaaji janani. ²⁹ Hara fow ko sahaabaabe? Kaa hara fow ko haaloobe ko Alla longini dun? Kaa hara fow ko jannoobe? Kaa hara fow waday kaawakeeji moyyi?³⁰ Kaa hara fow yeda dokke nawndugol? Kaa ko fow yedaa wowlugol e haalaaji janani? Kaa hara fow ko nantinoobe din haalaaji? ³¹ Kono himmanee dokke burde moyyude den. Awa mi hollay on kadi laawol burngol moyyude ngol.

Fii Giggol

13 ¹ Hay si mi wowlii e haalaaji yimbe ben e di malaa'ikaabe ben, si tawii mi alaa giggol, haray ko mi talenhun sila senyooohun, maa foolifen wondo e iidude. ² Hay si mi yedaama dokkal haalugol ko Alla longinimmi kon e faamu fii gundooji din fow e gande den fow, e hay si mi hebii gomdinal haa ka tawata mi dillinay pelle den, si tawii mi alaa giggol, haray hinaa mi fus. ³ Hay si mi okkitirii keyeeji andin fow fii nammingol miskinbe ben, e hay si mi okkitirii bandu an ndun fii yo ndu sunne, si mi alaa giggol, dun nafataa lan huunde.

⁴Giggol ko mujal, giggol ko moyfuki, giggol nawlataa, giggol mantotaako, hinaa heewungol mawnintinaare. ⁵Ngol waasaa needi, ngol dabɓataa nafa maggol, ngol yaawataa seytinde, ngol marataa bone. ⁶Ngol weltortaa angal peewal, kono ko goonga ngol weltorta. ⁷Giggol hejɓay ko woni woo, hingol hoolii ko woni woo, hingol tanyinii e ko woni woo, hingol wakkilii ko woni woo.

⁸Giggol ngol lannataa haa poomaa. Haalugol ko Alla longini dɗun feyɗay, *haalaaji janani kadi feyɗay, gandal kadi feyɗay. ⁹Ko fii gandal men ngal hinaa timmungal, ko haaleten kon e nder ko Alla longini en kon kadi hinaa ko timmi. ¹⁰Ko fii, nde ko laatii kon aroyi woo, ko timmaa kon feyɗay. ¹¹Wa fewndo ko mi wonnoo paykun, mi wowlirayno wa paykun, mi miijorayno wa paykun, mi jaawirayno kadi wa paykun. Bay mi wonii mokobaa, mi feyɗani paykunyaagal. ¹²Hande hiden tintora ndaarorgal e noone no niɓbitiri, kono en yi'oyay kene e kene. Ko mi andi kon hande timmaa, kono mi andiroyay wano Alla andirimmi non. ¹³Jooni non kodii piiji doo tati luttata: ko gomdinal e tama'u e giggol. Kono koburi mawnude kon, ko giggol.

Fii Dokke e Longineede noone Haalaaji

14 ¹Awa dabɓee giggol ngol, himmanon dokke iwruɗe e Ruuhu Alla dɗen, tentinii haalugol ko Alla longini dɗun. ²Dun, on wowluɗo e *haala janana, haray hinaa yimbe ɓen o wowlani, ko Alla. Ko fii hay gooto alaa mo faamude, awa kadi ko ruuhu o woni wowlirde dɗin gundooji. ³Kono haaloowo ko Alla longini dɗun kon ko yimbe ɓen o woni yewtude, o tiidina ɓe, o wakkilina ɓe, o yarlina ɓe. ⁴On wowloowo e haala janana non ko hoore mun tun o woni tiidinde, kono wondo haalude ko Alla longini dɗun kon kapun ko *moftal ngal o woni tiidinde. ⁵Mido yidi on fow yo on wowlu e haala janana, kono ko mi ɓuri faaleede kon ko yo on wonu haaloobe ko Alla longini dɗun. Ko fii on haaloowo ko Alla longini dɗun no

ɓuri wowloowo e haalaaji janani on mawnude, si hinaa hara on nedɗo nantin ɗun fii no moftal ngal tiidiniree.

⁶Jooni non, yo musibbe an, si mi arii ka mon e yewtugol on e haalaaji janani, haray ko hondun mi nafi on, si wonaa hara ko kongol gandal maa jannde maa haalugol ko Alla longini ɗun maa feɗɗinande mi woni wowlude? ⁷Si tawii aalaaji ɗi wuuraa no wafude hito, wano serdu maa hoddu, si hito majji on laabaali, haray ko honno andirton galli majji on? ⁸E si tawii hito *liital ngal laabaali, ko hombo eɓɓindantoo hare nden? ⁹Onon kadi wano non, si tawii on alaa yewtude haala faamotooka e nder ko wowloton e haalaaji janani kon, ko honno ɓe andirta ko wondon wi'ude kon? Ko fii haray ko hendu ndun wondon wowlande. ¹⁰Noone haalaaji buy no woodi e oo aduna, kono alaa e majji ngol alaa firo. ¹¹Si tawii non mi faamataa haala ka godɗo woni yewtude lan kan, mi wonanay mo janano, kanko kadi o wonanammi janano. ¹²Onon kadi non, ɓay hidon himmande dokke iwruɗe e Ruuhu Alla ɗen, yo taw ko fii tiidingol moftal ngal wondon himmirande ɗen dokke haa feyɗita.

¹³Kodun wadi, on wondo yewtude e *haala janana longinaaka, yo toro fii no waawira nantinirde. ¹⁴Ko fii si mido toraade Alla e haala janana longinaaka, haray ruuhu an on no toraade, kono haray mi alaa faamude. ¹⁵Awa ko hondun mi wadata? Haray yo mi toror ruuhu, kono yo mi toror kadi faamu, mi beytira ruuhu, kono mi beytira kadi faamu. ¹⁶Si hinaa ɗun, si a mantirii Alla ruuhu on, ko honno joodiido tun e hakkunde hedotoobe ɓen jabirta «aamiina» e nder ko wondaa jarnude kon, ɓay o andaa ko hondun wondaa wi'ude? ¹⁷Ko goonga, hida jarnirde no moyɗiri, kono a tiidinaali oya.

¹⁸Mi jarnii Alla ko tawi kon mido wowlude e haalaaji janani ɓuri on on fow.

¹⁹Kono ka nder moftal, ko haalirgol hakkille an ɗen konguɗi jowi jannayɗi beya ɓuranimmi haalugol konguɗi guluuji sappo e haala janana. ²⁰Musibbe an, wota on

mijor wa paykoy. E telen-ma ka bone, wonee paykoy tosokoy, kono mijoron wamokobaaɓe. ²¹ Ko fii no windii ka Sariya, Joomiraado on no daali:

«Ko yimbe ɓe haalaaji janani

eɓe kundule janane

mi wowliranoyta oo jamaa.

Hay ɗun ɓe hedoytaako lan.»ⁿ

²² Awa, haalaaji janani ɗin ko maande fii ɓe gomɗinaa ɓen, hinaa fii gomɗinɓe ɓen. Kono haalugol ko longinaa kon ko maande fii gomɗinɓe ɓen, hinaa fii ɓe gomɗinaa ɓen.

²³ Si tawii moftal ngal fow mottondirii, mo kala no wowlude e haalaaji janani, hedotoobe nii tun arii, maa ɓe gomɗinaa, e hara ɓe wi'ataa ko on feetube? ²⁴ Kono si tawii fow no haalude ko Alla longini ɗun, mo gomɗinaa maa hedotoodo nii tun aru e taweede, ɗun fow faaminay mo fii junuubaaji makko, jaawa mo kadi, ²⁵ gundooji ɓernde makko nden kadi feɗɗinte, onsay o sujjay ka leydi, o rewa Alla, o qirritoo wonde ko goonga Alla no hakkunde mon.

Fii no Moftal ngal Haani Wonirde

²⁶ Musiɓɓe an, ko honno non warreten jooni? Nde mottondirdon woo, mo kala e mon no mari beytol, maa jannde, maa ko feɗɗinanaa, maa haala janana, maa noone nantingol. Yo fow wadire fii tiidingol. ²⁷ Si no wowleede e haala janana, wota ɓuru ɗiɗo maa tato, e yo ɓe lontondir, tawa kadi no woodi nantinoowo. ²⁸ Si nantinoowo alaa, haray yo wowloowo on deyyu ka mottondiral, o yewtitoo ka ɓernde makko, o yewta Alla kadi.

²⁹ Fii haaloobe ko Alla longini ɗun ɓen kapun, yo ɗiɗo maa tato yewtu, ɓeya taskoo ko yewtaa kon. ³⁰ Si godɗo goo feɗɗinanaama godɗun, yo oya on fanku. ³¹ Ko fii on fow hidon waawi lontondirde haalon ko Alla longini on kon, fii

ⁿ14.21 Isa. 28.11-12

no fow jangira wakkiloo. ³² Ruuhuuji haaloobe ko Alla longini dun ben no yankinani ben haaloobe ko Alla longini dun. ³³ Ko fii Alla hinaa Alla jii boldu, kono ko mo o buttu.

³⁴ Ko yo rewbe ben deyyu ka hakkunde mbatu, wano woniri non e nder moftte gomdinbe ben fow, bay newnanaaka be ka be wowla, kono ko yo be wonu yankiniibe wano Sariya on kadi wi'iri non. ³⁵ Si tawii kambe rewbe ben hiibe faalaa andude e tobbe goo, yo be lando moodiibe mabbe ben tigi ka cuudi. Ko fii no hersinani debbo yewtugol ka hakkunde mbatu.

³⁶ Kaa ko e mon daaluyee Alla on iwri? Kaa ko haa e mon onon tun o ari? ³⁷ On mo sikki ko haaloowo ko Alla longini dun, maa yedaado dokkal iwrungal e Ruuhu Alla on, yo o jabu wonde ko mi windani on kon ko yamiroore Joomiraado on. ³⁸ On mo itti yiila e dun, wattantaake yiila e makko.

³⁹ Kodun wadi, yo musibe an, himmanee haalugol ko Alla longini on kon, e wota on hadu wowlee e haalaaji janani. ⁴⁰ Kono yo fow warru no haaniri non, hara ko no yaadiri.

Fii Ummutal Almasiihu on

15 ¹ Mi andinii on, yo musibe, fii oo Kibaaru Moyyo mo mi feyninani on, mo jabudon, on mo catidon e mun, tabitudon, ² dun ko on mo dandiradon kadi, si tawii hidon jogori mo no mi feyninirani on mo non, si tawii non hinaa non, haray on gomdini mo meere.

³ Ko adii kon, ko ko mi hendii kon mi feyninani on: Almasiihu on ko fii junuubaaji men din maayiri, wano windori non ka defte annabaabe ben, ⁴ o surraa, o immintinaa ka jalaande tammere, wano windori non ka defte annabaabe ben. ⁵ Oo wi'eteedo Petruusu yi'ii mo. E hoore dun kadi sappoo e didoobe ben yi'ii mo. ⁶ Bawto dun, buri musibe teemedde njowo yiidi mo nde wootere, be tawata burbe ben e hakkunde mabbe no wuuri fewndo doo, wobbe

ben maayiino. ⁷ Bawto ðun kadi Yaaquuba yi'i mo. E hoore ðun, *sahaabaabe ben fow yi'i mo.

⁸ Bawto bendon fow, o hollitii e an min kadi oo wa'udo wa jibinaado hewtaali. ⁹ Ko fii hari min mi hewtaa sahaabaabe ben, mi handaa kadi e noddeede sahaabaajo, ko fii mido cukkotonoo *moftal Alla ngal. ¹⁰ Ko sabu moyfere Alla nden wadi si mi woni ko mi woni kon. Awa kadi moyfere makko nden e telen-ma an wonaali meere. Ka liddu ðun, mi gollii ßuri be be fow. Kono fow e mun hinaa min, kono ko moyfere Alla wonde e an nden. ¹¹ Kodun wadi, woni ko min, woni ko kambe, ko ðundoo men waajii, ko ðun kadi gomðindon.

Fii Ummutal Maybe ben

¹² E hin-le, si men waajike wonde Almasiihu on immitike e hakkunde maybe ben, haray ko honno wobbe e mon wi'irta wonde ummutal maybe alaa? ¹³ Si tawno ummutal maybe alaa, harayno Almasiihu on tigi immitaaki. ¹⁴ Awa si tawii Almasiihu on immitaaki, haray waaju amen ngun ko meere, gomðinal mon ngal kadi ko meere. ¹⁵ Haray kadi ko men seeditotoobe fenaande e fee Alla, ko fii men seeditanike Alla wonde o immintinii Almasiihu on, hara-le o immintinaali mo si tawno maybe ben immitotaako. ¹⁶ Ko fii si tawno maybe ben immitotaako, harayno Almasiihu on kadi immitaaki. ¹⁷ E si tawii Almasiihu on immitaaki, haray gomðinal mon ngal ko meere, haray haa jooni hidon e nder junuubaaji mon ðin. ¹⁸ Harayno maydube e gomðinal Almasiihu on ben ko hayrube. ¹⁹ Si tawii ko e nder oo aduna tun tanyinorden Almasiihu on, haray e hakkunde yimbe ben fow ko enen ßuri yurmude.

²⁰ Kono jooni non pellet Almasiihu on immintinaama e hakkunde maybe ben, ko kanko woni arano e ðun e nder maybe ben. ²¹ Bay mayde nden ko sabu neddo gooto ardi, ummutal maybe ben kadi ko sabu neddo gooto ardi. ²² Wano fow maayiri sabu *Aadama non, ko wano non kadi fow wuuritirta sabu Almasiihu on.

²³ Kono mo kala e saffewol mun. Ko Almasiihu on woni arano on, si hikka don jeyaabe Almasiihu on ben, nande ardu makko ndun. ²⁴ Ontuma, darngal daroo, ka o jonnitata don laamu ngun Alla Baabaajo on, bawto bonnugol kala laamu e kala bawgal e kala doole. ²⁵ Ko fii bee Almasiihu on laamoo haa tuma o watti aybe makko ben fow ka ley koyde makko. ²⁶ Gajo sakkiteedo muleede on, ko mayde nden. ²⁷ Kodun wadi si Alla wadii fow ka ley koyde makko. Kono si wi'aama fow yankinanaama mo, ka haqiiqa, haray on Yankinando mo kala huunde tawaaka. ²⁸ E nde piiji din fow yankinanoyaa mo, onsay Biddo on tigi yankinanto on Yankinando mo kala huunde, fii no Alla wonira fow e di fow.

²⁹ Awa ko hondun wonbe lootanaade maybe ben maande kisiyee wadata? Si tawii maybe ben immitotaako few, haray ko fii hondun be lootantoo maande kisiyee fii mabbe? ³⁰ Enen non fii hondun saa'i kala hiden e masiibo? ³¹ Nande woo mido weebitanii mayde nden. Midu seedintini dun, yo musibbe an, wano mi mantori on non e nder humondiral e Iisaa Almasiihu Joomi men on. ³² Si tawii ko e faale neddanke mi habiri kulle den ka saare Efeesi, haray ko nafa hondun mi heboyta? Si tawii maybe ben immitoytaako: «Haray naamen, yaren, bay jango en maayay.»³³ Awa wota on daynito, ko fii wondi bbe bonbe bonnay jikkuuji moyyi.

³⁴ Awa artee e ko feewi kon, wota on wadu junuubu. Ko fii wobbe ben maraa gandal fii andugol Alla, ko fii hersingol on mi wowliri dun.

Fii Balli Waylaadi din ka Ummutal

³⁵ Kono goddo no gasa wi'ude: «Ko honno maybe ben immitroyta e ko bandu hondu be ardoyta?» ³⁶ Ko an yo njoofojo, ko sankataa kon fudataa si maayaali. ³⁷ Ko sankataa kon hinaa bandu aroyooru ndun, kono ko abbere nii tun, no gasa ngawri maa awdi goo. ³⁸ E hoore dun, Alla yeda nden abbere bandu no o faaliraa, awdi kala o yeda dun bandu ko hawrani dun. ³⁹ Bandu fow wonaa gootun: wonndu ko

³³15.32 Isa. 22.13

ndu nedfanke, wonndu goo ko ndu kulle, wonndu goo kadi ko ndu colli, wonndu goo kadi ko ndu liyyí. ⁴⁰ No woodi kadi tagooje kammuyankeeje e tagooje adunayankeeje, kono ηari tagooje kammuyankeeje den no serti e ηari tagooje adunayankeeje den. ⁴¹ Naange ngen no mariηari mun feere, lewru ndun no mari ηari mun feere, koode den kadi no mari noone ηariiji mun sertudi.

⁴² Awa ko nii kadi wonirani ummutal maybe ben: si bandu ηolayndu sankama, ko ndu ηolataa immitoytoo. ⁴³ Si bandu ηiddundu sankama, ndu immitodoyto e darja. Si bandu lo'undu sankama, ndu immitodoyto e doole. ⁴⁴ Si bandu adunayankeeru sankama, ndu immitoyto ruuhuyankeeru.

Si bandu adunayankeeru no woodi, haray bandu ruuhuyankeeru no woodi. ⁴⁵ Ko dun wadi si no windii: «Aaden arano on, dun ko Aadama, hebi ngurndan, o wuuri.»^p Kono Aadama sakkitoro on ko ruuhuyankeejo yedoowo ngurndan.

⁴⁶ Hinaa arano on woni ruuhuyankeejo on, kono kobanduyankeejo, ko ko hikkii don kon woni ruuhuyankejun dun. ⁴⁷ Neddo arano on ko e leydi ndin suutaa, ko mo ka leydi, neddo dimmo on kajun ko ka kammu iwri. ⁴⁸ Ben be ka leydi no wa'i wa mo ka leydi on, ben be ka kammu kadi no wa'i wa on mo ka kammu. ⁴⁹ Ko wano nanditirden e mo ka leydi on non, ko wano non kadi nanditroyten e oo mo ka kammu.

⁵⁰ E hino ko mi woni wi'ude kon yo musibbe an. Ka bandu ndun e yiiyan dan waawaali hebude gebal ka *laamu Alla don, ko don kadi woni ko ηolata hebataa gebal e ko ηolataa kon. ⁵¹ Awa e hino, mido wowlande on gundoo: en fow en maayataa, kono en fow en waylete, ⁵² e nder saa'ihun nii, yeru mayaango yiitere, ka wuttaandu *liital sakkitoral. Ko fii ngal wuttete, maybe ben immitoo ko bontataa, onsay enen non en waylete. ⁵³ Onsay bee nduu bandu ηolayndu lontiniree ndu ηolataa, awa kadi bandu maayayndu ndun lontiniree ndu

^p15.45 Fud. 2.7

maayataa.⁵⁴ Nde ndun bandu jolayndu lontiniraa ndu jolataa, e nde bandu maayayndu ndun lontiniraa ndu maayataa, onsay daalol windiingol ngol laatoto, wonde:

«Mayde nden modaaama e nder polgal.»^q

⁵⁵ «Ee mayde, ko honto polgal maa ngal woni?

Ee mayde, ko honto ndagawal maa ngal woni?»^r

⁵⁶ Kono ndagawal mayde ko junuubu, awa kadi doole junuubu ko Sariya. ⁵⁷ Yo mantoore wonan Alla, on Yedudo en polgal immorde e Iisaa Almasiihu Joomi men on.

⁵⁸ Awa yo musibbe an yidaabe, wonee tabitube be dillintaako, burtee beydaade e golle Joomiraado on, e hoore andugol wonde, golle monden e telen-ma Joomiraado on hinaa meere.

Fii ko Faaboraa kon Gomdinbe ben Yerusalaam

16 ¹ E telen-ma mottindirgol fii wallitagol yimbe Alla ben, wadiree onon kadi wano mi yamiriri *moftte wonde Galaasi den non. ² Yo mo kala e mon hebu ko anniyii, wallini feere beru maral makko ngal ka jallal aranal e nder yontere nden, dun ko alattiire nden, fii wota on habbo haa tuma mi ari fii mottindirgol dun. ³ Dun, nde mi aroyi, mi wattiday e be subidon ben dokke monden, wondude e bataake, be naaba *Yerusalaam. ⁴ Si tawoyii non bee mi yaha min tigi, mi yaadoyay e maabe.

Fii Ebbooje Puulusa den

⁵ Mi yahoyay ka mon nde mi tayitoi Masedonii, ko fii mi rewoyay Masedonii. ⁶ No gasa mi jallidoyay e mon, maa toode mi ruumida e mon, fii no ardoron mi ka mi yahata ton. ⁷ E ngol laawol doo mi faalaaka rewude ka mon e hoore hawjere, kono mido tanyinii wondugol e mon seeda, si Joomiraado on newnii. ⁸ Kono fow e

^q15.54 Isa. 25.8

^r15.55 Hus. 13.14

mun, mi wonay Efeesi haa ka Juldeere *Pentakosta.⁹ Ko fii dambugal njanal udditanike golle an nden, awa kadi aybe ben no duudi.

¹⁰ Awa si Timotee hewtii, wadiree noone no o hulirtaa hakkunde mon, ko fii himo gollira wa an min e nder golle Joomiraado on. ¹¹ Awa wota gooto aybin mo. Neltee mo e jam fii no o hewtira ka an. Ko fii mido habbodi mo e musibbe ben.

¹² Telen-ma oo musidfo an Apoloosi, mi wakkilinii mo fota fii yaadugol e musibbe ben ka mon, hinaa non dun woni faale makko on fewndo doo. Kono o yahoyay nde o hebi fajuhun.

¹³ Wattanee yiila tabiton e nder gomdinal ngal, wakkilodon, tiidon.¹⁴ Ko wadoton woo wadiree giggol.

¹⁵ Mi yamirii on kadi yamiroore goo, yo musibbe an. Hidon andi kobeynguure Astefaana nden adii gomdinde e nder Akaaya, be woni kadi e kurkanagol yimbe Alla ben. ¹⁶ Awa onon kadi yankinane ben yimbe e kala gollidoobe e mabbe.¹⁷ Awa mido weltori arugol Astefaana ngol, e Fortunaatusa e Akayuuka, bay be wadonii lan ko on waawataano wadande lan. ¹⁸ Ko fii be wallintinii wonkii an kin wano be wallintiniri wonkiji mon din non. Awa manee sifa ben yimbe.

Fii Salmiango ngon ka Waynondiral

¹⁹ Moftal ngal *Aazii salminii on. Akiila kadi e Piriskiila, wondude e moftal wongal ka suudu mabbe ngal, salminii on fota e innde Joomiraado on.²⁰ Musibbe ben fow salminii on. Salmondiree, hirbondiron hirbondiral laabungal.

²¹ Min Puulusa, mi salminirii on jungo an ngon tigi. ²² On mo yidaa Joomi on, yo o laato hudaado. Yo Joomi on aru! ²³ Yo moyfere Iisaa Joomi on wonu e mon.

²⁴ Mido yidi on on fow sabu Iisaa Almasiihu on. Aamiina!

PREMIÈRE ÉPÎTRE DE PAUL AUX CORINTHIENS

en Langue Pular (Fouta-Jalon)

République de Guinée

© 2013 Traducteurs Pionniers de la Bible

en collaboration avec

Mission Protestante Réformée